

आकाशवाणी

पैहले खास-खास खबरां:-

1. प्रधानमंत्री नरेन्द्र मोदी हो'रें सेशेल्स लेई 175 मिलियन अमरीकी डॉलर दे विशेष पैकेज दी घोषणा कीती ऐ।
2. प्रधानमंत्री नरेन्द्र मोदी हो'रें मारिशस दे प्रधानमंत्री हुं'दे कन्नै फोन पर गल्लबात कीती ते हिंद महासागर क्षेत्र दी शांति ते स्थिरता दे सांझे लक्ष गी लेइयै किट्ठे रलियै कम्म करने दा धेइया फही पक्का कीता।
3. ब्रिक्स शिखर सम्मेलन दियें त्यारियें च लग्गे दे अधिकारियें दी पैहली बैठक कल नर्मी दिल्ली च लग्गी। भारत दे ब्रिक्स शेरपा हो'रें ब्रिक्स अध्यक्षता दियें प्राथमिकताएं गी उजागर कीता।
4. महाराष्ट्र जिला परिषद दे चुनाएं च 731 चा 552 सीटां लेइयै बी.जे.पी. दी अगुआई आहली महायुति नै शानदार जित दर्ज कीती ऐ।
5. आई.सी.सी. नै टी-20 विश्व कप 2026 दे सब्भनें तैयशुदा मैचें च पाकिस्तान दे शामिल होने दी तस्दीक कीती ऐ।

<><><><><><>

PM -Seychelles

प्रधानमंत्री नरेन्द्र मोदी हो'रें सेशेल्स लेई 175 मिलियन डालर दे विशेष पैकेज दी घोषणा कीती ऐ। कल नर्मी दिल्ली च सेशेल्स दे राष्ट्रपति डाक्टर पैटरिक हर्मनी हुं'दे कन्नै मलाटी दे बाद इक सांझे संवाददाता सम्मेलन गी सम्बोधित

करदे होई मोदी होरें आखेया जे ए पैकेज रिहाइश- ई मोबिलिटी- पेशेवराना सिखलाई- सेहत- रक्षा ते समुन्द्री सुरक्षा दे खेतर च सहयोग प्रदान करोग। भारत ते सेशेल्स नै सेहत- मौसम विज्ञान- इलैक्ट्रॉनिक्स- सूचना प्रोद्योगिकी ते सुशासन समेत बक्ख-बक्ख क्षेत्रें च सत समझौतें पर दस्तख्त कीते न। इस मौके मोदी होरें आखेया जे भारत ते सेशेल्स नां छड़ा भूगौलिक दृष्टि कन्नै सगुंआ इतिहास- विश्वास ते भविक्ख लेई सांझे दृष्टिकोण राए बी जुड़े दे न। मोदी होरें आखेया जे इक समुन्द्री गोआंडी ते भरोसेमंद भ्याल दे रुपै च सेशेल्स भारत दे “विजन महासागर” च इक टकोहदी ते महत्वपूर्ण थाहर रक्खदा ऐ।

<><><><><><>

Prez --Seychelles

राष्ट्रपति द्रौपदी मुरमू होरें राष्ट्रपति भवन च सेशेल्स दे राष्ट्रपति पैट्रिक हर्मिनी हुं'दे सम्मान च धाम दा आयोजन कीता। उन्दे सोआगत च उ'नें आखेया जे भारत ते सेशेल्स दे सरबंध आपसी भरोसे ते सम्मान ते लोकतंत्र ते बहुलवाद च सांझा आस्था पर आधारित न। उ'नें आखेया जे हिंद महासागर दियां लैहरां ते दौनें मुखें दे लोके बशकार इंगे सांस्कृतिक सरबंध असेंगी इक दुए कन्नै जोड़दे न। उ'नें इस गल्ला पर लौस पाई जे सेशेल्स भारत दे महासागर बिजन च इक महत्वपूर्ण थाहर रक्खदा ऐ। इसदा मकसद लगातार टिकाऊ विकास आस्तै क्षमता निर्माण ते सांझा भविक्ख लेई सुरक्षा दे थम्में पर आधारित सहयोग गी होर मज़बूत करना ऐ। राष्ट्रपति हो'रें मेद जाहिर कीती जे घोषित खास आर्थिक

पैकेज कन्नै सेहत- बुनियादी ढांचा- शिक्षा- रक्षा जनेह क्षेत्रें च भारत-सेशेल्स सहयोग गी नमीं गति थोग।

<><><><><><>

PM -Mauritius

प्रधानमंत्री नरेन्द्र मोदी हो'रें कल मॉरिशस दे प्रधानमंत्री डाक्टर नवीन चन्द्र रामगुलाम हुंदे कन्नै फोन पर गल्लबात कीती। इस बारे सोशल मीडिया पर जानकारी सांधी करदे होई उ'नें आखेया जे दौनें मुख्यें दे ऐतिहासिक- जनता हितैषी ते विशेष सरबंधें गी होर निग्गर करने दी वचनबद्धता इस गल्लबात दौरान दोराही गई ते व्यापक सहयोग च होई दी प्रगति दी बी समीक्षा कीती गई। मोदी हो'रें आखेया जे भारत ते मॉरिशस हिंद महासागर क्षेत्र शांति ते स्थिरता दे सांझे लक्ष गी लेइयै किट्ठै रलियै कम्म करना जारी रखगंन।

<><><><><><>

Jaiswal -BRICS Sherpa

ब्रिक्स शिखर सम्मेलन दियें तयारियें च लग्गे दे अधिकारियें दी पैहली बैठक कल नमीं दिल्ली च लग्गी। ब्राजील- रूस- भारत- चीन दे दक्खन अफ्रीका ब्रिक्स संगठन दे मुंडले मिम्बर न। भारत चौथी बारी एहदी अध्यक्षता करने जा'रदा ऐ। आर्थिक सरबंध सचिव ते भारत दे ब्रिक्स शेरपा सुधाकर डलेला हो'रें प्रधानमंत्री नरेन्द्र मोदी हुंदे जनहितैषी ते मनुक्खी सोच पर आधारित भारत दी ब्रिक्स अध्यक्षता दियें प्राथमिताएं दा जिक्र कीता ते संगठन दे उस लक्ष गी टकोहदे तौरा पर उजागर कीता- जेहदे च नवाचार- सहयोग ते निरंतरता बनाई रक्खना

बी शामिल ऐ। एहदे शा पैहले भारत 2012- 2016 ते 2021 च बी ब्रिक्स दी अध्यक्षा करी चुके दा ऐ।

<><><><><><>

Shivraj-India US

राई-बाई ते करसान कल्याण मंत्री शिवराज सिंह चौहान होरें भारत अमरीका बपार समझौते पर कांग्रेस पार्टी दी नुख्ताचीनी दे परते च आखेआ ऐ कि एह समझौता राईबाई ते करसाने दे हितें दी पूरी चाल्ली रक्षा करदा ऐ ते एहदे च प्रमुख कृषि उत्पादें गी शामिल नई कीता गेदा ऐ। जन्दे रोज भोपाल च इक कार्यक्रम दरान अपने संबोधने च चौहान होरें आखेआ कि इस समझौते च ऐसे कुसै उत्पाद गी शामिल नई कीता गेआ ऐ जेहदे नै भारती करसाने कोई कुसै बी चाल्ली दा नुकसान पुज्जी सकदा ऐ। उनें आखेआ कि सरकार लेई करसाने दा हित सभने शा उप्पर ऐ। कांग्रेस पार्टी आसेआ इस बपार समझौते दी नुख्ताचीनी करने पर कृषि मंत्री होरें आखेआ कि केइएं दाहकें तगर सत्ता च रौहने दे बावजूद बी कांग्रेस भारती करसाने गी अंतरराष्ट्री बजारें कन्ने जोड़ने च नाकाम रेही ते नां गै उंदी आर्थिक स्थिरता गी यकीनी बनाई सकी। उनें आखेआ जे एह समझौता पूरी चाल्ली करसान हितैशी ऐ कीजे एह उंदी आजीविका दी रक्षा करदा ऐ ते भारती कृषि गी संरक्षण प्रदान करदा ऐ।

<><><><><><>

Maha- Zilla Parishad Polls

महाराष्ट्र जिला परिषद चुनाव च बी.जे.पी. दी अगुआई आहले महायुति गठबंधन नै शानदार जित दर्ज कीती ऐ। राज्य चुनाव आयोग आसेया घोषत नतीजे च

महायुति नै 731 चा 552 सीटें पर जित्त हासल कीती ऐ। सत्ताधारी गठबंधन च बी.जे.पी. 225 सीटें कन्नै अक्वल नम्बर पर ऐ- जेहदे परैन्त अजीत पवार हुंदी अगुआई आहली राष्ट्रवादी कांग्रेस पार्टी नै 165 ते एक नाथ शिंदे हुंदे नेतृत्व आहली शिवसेना नै 162 सीटां जितियां न। तोंआई महाविकास अघाड़ी च कांग्रेस नै 55- उदद्वव ठाकरे हुंदी अगुआ आहली शिव सेना नै 43 ते शरद पवार हुंदी अगुआई आहली एन.सी.पी. नै 26 सीटां हासल कीतियां न।

<><><><><><>

PM –Maharashtra Poll

प्रधानमंत्री नरेन्द्र मोदी होरें महाराष्ट्र दे जिला परिषद चुनाएं च बी.जे.पी. ते महायुति दी शानदार जित्त पर मबारकबाद दिंदे होई सोशल मीडिया पर लिखेया ऐ जे ग्राएं कोला लेइयै शैहरी इलाकें धोड़ी महाराष्ट्र दे लोक सुशासन चाहंदे न- तां गै उ'नें उस गठबन्धन गी अपना समर्थन दिता ऐ जेहड़ा राज्य दे सनैहरी सांस्कृतिक विरसे दी शान गी बरकार रक्खने लेई कम्म करा'रदा ऐ। मोदी होरें जमीनी सतह पर कम्म करने आहले पार्टी दे कारकूनें गी चेचे तौरा पर मबारकबाद दिती ऐ।

<><><><><><>

ICC Pakistan –Bangladesh

अंतराष्ट्रीय क्रिकेट परिषद ICC नै मर्दे दे टी-20 विश्व कप 2026 दे सब्भनें तैयशुदा मैचें च पाकिस्तान दे शामिल होने दी तस्दीक कीती ऐ। एहदे च 15 फरवरी गी कोलम्बो च भारत ते पाकिस्तान बश्कार होने आहला मैच बी शामिल

ऐ। ICC नै दस्सेया ऐ जे पाकिस्तान क्रिकेट बोर्ड नै गल्लबात व्यापक सहयोग दा हिस्सा ही- जेहदे च दौने धड़े खेड्ड दे हिते दी रक्षा लेई निपक्खता ते सहयोग भावना कन्ने इकजुट- प्रतिबद्ध ते लक्षकेन्द्रित होने पर सैहमती प्रगट कीती ऐ। एहदे शा पैहले ICC- पाकिस्तान क्रिकेट बोर्ड ते बांगलादेश क्रिकेट बोर्ड बशकार इक बैठक होई ही। एहदे बाद ICC नै इस गल्लै दी तस्दीक कीती ही जे बांगलादेश गी टूर्नामेंट थमां गैर हाजर रौहने कारण कुसै बी चाल्ली दी सजा दा सामना नैई करना पौग।

<><><><><><>

T-20 World Cup

आई.सी.सी मर्दे दे टी-20 विश्व कप च कल बी त्रै मैच खेड्डे गे। पैहला मैच स्कॉटलैंड ते इटली बशकार खेडेया गया- जेहदे च स्कॉटलैंड नै इटली गी 73 रन्ज कन्ने हराई दिता। पैहले बल्लेबाजी करदे होई स्कॉटलैंड नै 20एं ओवरें च 4 विकेटें दे नुकसान पर 207 रन्ज बनाए। परते च इटली दी टीम 16 ओवर ते 4 गेदें च छड़े 134 रन्ज गै बनाई सकी। कल खेड्डे गेदे इक होर मैच च जिम्बाव्वे नै ओमान गी 8 विकेटें कन्ने हराई दिता। पैहले बल्लेबाजी करदे होई ओमान दी टीम नै 19 ओवर ते 5 गेदें च 103 रन्ज बनाए जेहदे परते च जिम्बाव्वे नै 13 ओवरें ते 3 गेदें च 2 विकेटें दे नुकसापन पर 106 रन्ज बनाइयै मैच जिती लैता। त्रीया मैच दक्खन अफ्रीका ते कनाडा बशकार खेडेआ गया । टास हारियै पैहले बल्लेबाजी करदे होई दक्खन अफ्रीका नै 20 ओवरें च 213 रन्ज बनाए- जेहदे परते च कनाडा दी टीम 8 विकेटें दे नुकसान पर 156

रन्ज गै बनाई सकी ते दक्खन अफ्रीका नै एह मैच 57 रन्ज कन्नै जिती लैता।
अज्ज बी 3 मैच खड्डे जाने न- जिंदे च पैहला मैच बड्डलै 11 बजे दिल्ली च-
नीदरलैंड ते नामीबिया बश्कार- दूआ दिनें 3 बजे चेन्नेई च- न्यूजीलैंड ते संयुक्त
अरब अमीरात बश्कार ते त्रीया शामी 7 बजे कोलम्बो च- पाकिस्तान ते
अमरीका बश्कार खेडेया जाहग।

<><><><><><>

Delhi New CEO

भारती चुनां आयोग नै अशोक कुमार हो'रें गी दिल्ली दा नमां मुख चुनां
अधिकारी नियुक्त कीता ऐ। ओ आर एलिस वाज़ हुंदी थाहर- एह ओहदा
साम्भगंन। दिल्ली दे मुख सचिव हो'रें गी लिखी दी इक चिट्ठी च आयोग नै
आखेया ऐ जे अशोक कुमार तुरत प्रभाव कन्नै दिल्ली दे मुख चुनां अधिकारी
दे तौरा पर अपना कम्मकाज साम्भी लैन।

<><><><><><>

Vaishnaw Sergio Gor

इलैक्ट्रॉनिक्स ते सूचना प्रोद्योगिकी मंत्री अश्विनी वैष्णव हो'रें अमरीकी राजदूत
सर्गियो गोर हो'रें नमीं दिल्ली च मलाटी कीती। दौनें नेताएं कार्यनीतिक सरबंध
मज़बूत करने पर विचार कीता। सोशल मीडिया दी इक पोस्ट च वैष्णव हो'रें
आखेया जे आर्टिफिशियल इंटेलिजेंस प्रभाव शिखर सम्मेलन 2026 च अमरीका
दी मज़बूत हिस्सेदारी दी प्रतीक्षा ऐ।